

КАНОН СВЯТОМУ ВЕЛИКОМУЧЕНИКУ И ПОБЕДОНОСЦУ ГЕОРГИЮ

Творение кир Феофана

Глас 2-й

Песнь 1

Ирмос: Во глубине постла иногда фараонитское всевоинство преоруженная сила, воплощающееся же Слово всезлостный грех потребило есть, препрославленный Господь, славно бо прославился.

Припев: Святой великомучениче, победоносче и чудотворче Георгие, моли Бога о нас.

Теплою верою и любовью призывающия тя, мучениче Христов, венценосче Георгие, предстоя всесветел честному престолу всеми Владущаго, твоими молитвами и предстательствы сохрани.

Святой великомучениче, победоносче и чудотворче Георгие, моли Бога о нас.

Благородно возделание Христу был еси, Георгие, мученическими возделан деянии, и, яко богатство преславно, в Небесных тя сокровищах положи Подвигоположник, яко преизящне храбрствовавшаго.

Святой великомучениче, победоносче и чудотворче Георгие, моли Бога о нас.

Твердо и терпеливно устремился еси, самозван, к подвигом, преблаженне Георгие, и, низложив свирепое мучителей ополчение, молитвенник о всех, призывающих тя, был еси.

Слава: Блаженную, славне, жизнь ныне восприем, во Христе сокровенную, Георгие, о нейже подвизался еси до крове, верою поющим тя моли спастися от всякаго, страсотерпче, обстояния.

И ныне: Богородичен: Небо была еси словесное, Слово Небесное в Твоей утробе, Богомати, вмещая, Имже вся быша: Небо же, и земля, и яже вышше сих. Темже со дерзновением моли спасти поющия Тя.

Песнь 3

Ирмос: Процвела есть пустыня, яко крин, Господи, языческая неплодящая, Церковь, пришествием Твоим, в нейже утвердися мое сердце.

Святой великомучениче, победоносче и чудотворче Георгие, моли Бога о нас.

Венцем страдания сияя, славне, благочестно призывающия тя моли Избавителя и Бога от всякия нужды, блаженне, избавити.

Святой великомучениче, победоносче и чудотворче Георгие, моли Бога о нас.

Богатыми просвещаемая сиянии, премудре, мрачную отжени печаль и мглу страстей от нас, верою восхваляющих тя.

Слава: Надежду утверждаема и любовь, верою же ограждься, Георгие, и силую укрепься Христовою, идольскую прелесть низвергл еси.

И ныне: Богородичен: Просвещшаго концы, Пречистая, родила еси с плотию Безплотнаго и прежде всех Отцу Собезначальна, темже Тя, Богородицу, вернии, чтим.

Седален, глас 8-й:

Благочестия образы мужески храбрствуя, нечестия прелесть низложив, мучениче, поправ еси врага шатания и, Божественным желанием присно разгараемь, мучителей угасил еси безбожное сверепство. Темже достойно возмездие мук приял еси венец и подаеши исцеления верою притекающим. Стратотерпче Георгие, моли Христа Бога согрешений оставление даровати празднующим любовь святую память твою.

Слава, и ныне:

Земное богатство на земли раздаваяй всем, мучениче мудре, богатство Небесное наследовал еси труды твоими, Крестом бо честным, яко в броню, оболкся и тем посрамил еси мучителей шатание. Темже молитвами просящим тя подаеши Божественная дарования, исцелений благодаяния. Стратотерпче Георгие, молися Христу Богу, прегрешений оставление даровати празднующим любовь святую память твою.

Песнь 4

Ирмос: Пришел еси от Девы не ходатай, ни Ангел, но Сам, Господи, воплощься, и спасл еси всего мя, человека. Тем зову Ти: слава силе Твоей, Господи.

Святой великомучениче, победоносче и чудотворче Георгие, моли Бога о нас.

Поем твоя подвиги, преблаженне Георгие, имже разсыпал еси идольския службы, всю же упразднил еси демонскую прелесть, преславне.

Святой великомучениче, победоносче и чудотворче Георгие, моли Бога о нас.

Утиши напастей и бед смущение и всякое наветие злое демонов отжени от поющих тя, Христова воина, досточудне.

Слава: Возсиял еси, яко звезда светоносная, Георгие, душевною доблестию и твердостью веры прелесть мрачную отгоня и спасая поющих тя.

И ныне: Богородичен: Спасение существенное, Дево, родила еси, богатством благодати и естественною благодатью спасающее человека и истлевший образ назидующее.

Песнь 5

Ирмос: Просвещение во тьме лежащих, спасение отчаянных, Христе, Спасе мой, к Тебе утренюю, Царю мира, просвети мя сиянием Твоим: иного бо, разве Тебе, бога не знаю.

Святой великомучениче, победоносче и чудотворче Георгие, моли Бога о нас.

Мученическое дерзновение яко имея ко Владыце, проси усердно спасения тя поющим, душевных недугов изменяя твоими мольбами, мучениче страстоносче, преблаженне Георгие.

Святой великомучениче, победоносче и чудотворче Георгие, моли Бога о нас.

Со Ангельскими ликуя, яко мученик, ликостоянии и бессмертныя и блаженныя, венценосче, насыщаяся славы, покрову твоему прибегающия всякаго треволнения и бури исхити.

Слава: Избави нас от всякия нужды, яко Милостив, греховное и бедное отгоня многообразное смущение, Георгия Твоего угодника молитвы, Христе, приемля.

И ныне: Богородичен: Долг праматере Евы, Богомати, отдала еси, плотию бо обложила еси из Тебе рожденна Спаса мира. Темже Тя вси блажим, обрадованная Дево Всенепорочная.

Песнь 6

Ирмос: В бездне греховней валяясь, неизследную милосердия Твоего призываю бездну: от тли, Боже, мя возведи.

Святый великомучениче, победоносче и чудотворче Георгие, моли Бога о нас.

Паче естества, и слова, и помысла доблести твоея храбрствования, непрестанно певаема, преблаженне мучениче Георгие.

Святый великомучениче, победоносче и чудотворче Георгие, моли Бога о нас.

Воинству Небесному собеседник, блаженне, быв и Божественное явление елико достижно зря, ты верою чтущия спасай.

Слава: Всеми образы Богу возложен и блистания чудес приемля, дарования требующим раздаваеши, преблаженне Георгие.

И ныне: Богородичен: Ныне к Тебе прибегаю, Пречистая, спаси мя молитвами Твоими и соблюди: елико бо хочещи, можещи, яко Мати Всемогущаго.

Кондак, глас 4-й

Возделан от Бога, показался еси благочестия делатель честнейший, добродетелей рукояти собрав себе: сеяв бо в слезах, веселием жнеши, страдальчествовав же кровию, Христа приял еси и молитвами, святе, твоими всем подаеши прегрешений прощение.

Икос

За мирский живот душу свою положившаго, Христа Царя желая, воин тщится умерети за Него, ревность же велию Божественную в сердцы имея, себе самого приведе. Того убо и мы вси, Божественнаго Георгия, яко тепла предстателя воспоим верою, яко славнаго суща Христова раба, подобящаяся яве своему Владыце и всякому молящуся приходяща: спешит бо присно и молит Спаса всем подати согрешений прощение.

Песнь 7

Ирмос: Богопротивное веление беззаконующаго мучителя высок пламень вознесло есть, Христос же простре Богочестивым отроком росу духовную, Сый благословен и препрославлен.

Святый великомучениче, победоносче и чудотворче Георгие, моли Бога о нас.

Твоему подобяся, мучениче, Владыце, волею потекл еси к подвигом, славне, и, победу взем, Церкви Христовы хранитель был еси: Сию присно сохраняй предстательством твоим.

Святый великомучениче, победоносче и чудотворче Георгие, моли Бога о нас.

Яко мученик непобедим яко страдалец, яко неодоленный веры поборник, ныне столп непоколебим восхваляющим тя, премудре Георгие, буди, ограждая молитвами твоими.

Слава: Мудре земледелав Божественное семя, и сие умножил еси, кровей твоих теченьми напоив, блаженне, и болезней тщанием, и различными ранами, имиже сверепство мучителей угасил еси.

И ныне: Богородичен: Дева пребыла еси и по рождестве, Бога бо родила еси, питающаго всяческая, за неизреченную милость и милосердие многое Человека бывшаго, Чистая, Егоже ныне моли спастися всем нам.

Песнь 8

Ирмос: Пещь иногда огненная в Вавилоне действия разделяше, Божиим велением халдеи опаляющая, верныя же орошающая, поющая: благословите, вся дела Господня, Господа.

Святой великомучениче, победоносче и чудотворче Георгие, моли Бога о нас.

Поток лютых страстей же и бед, и мятежного обстояния, и болезней падения, и демонов козни, и злочестивых стремления укроти твоими молитвами, венценосче Георгие.

Святой великомучениче, победоносче и чудотворче Георгие, моли Бога о нас.

Весь светом, блаженне, Троическим чисто облистаемь, яко мученик непобедим, яко благочестия поборник, яко победитель Боговенчанен, спаси, Небесный жителю, тя чтущия молитвами твоими.

Слава: Венцем разумным различно украшен, и Царствия диадимую, и скиптром удобрен, и багряницею обложен, твоею обогрен кровию, блаженне, сцарствуеши Царю сил.

И ныне: Богородичен: От Отца, бездетно Рожденнаго и прежде век возсиявша, всяческая сотворшаго, видимая же и невидимая, Дево Мати, родила еси. Темже Тя, Богородицу, вси языцы, славим.

Песнь 9

Ирмос: Безначальна Родителя Сын, Бог и Господь, воплощся от Девы, нам явися омраченная просветити, собрати расточенная. Тем Всепетую Богородицу величаем.

Святой великомучениче, победоносче и чудотворче Георгие, моли Бога о нас.

Непрестанно Господа моли о нас, поющих тя, блаженне, яко Христова мученика, яко победивша мучителя, яко лукавых духов отгонителя, яко хранителя неусыпна, яко заступника непостыдна.

Святой великомучениче, победоносче и чудотворче Георгие, моли Бога о нас.

Страданияи воздаяния богато тебе дарова всех Владыка, Емуже предстоя со дерзновением, преблаженне, мученическим и с веселием, призывающия тя, объемь, сохрани.

Слава: Земля тя сокры, и Небо прият, и отверзесе тебе дверь райская яве, в немже радостно, страстотерпче, ликуя и играя, верно поющия тя твоими молитвами соблюди.

И ныне: Богородичен: Тя свидения сень преобрази, Пречистая, в нейже скрижали, и стамна, и златый кивот: якоже бо оная, тако и Ты Безначальное Слово во утробе вместила еси, Богородице, воплощаемо.

МОЛИТВА

О, всехвальный, святой великомучениче и чудотворче Георгие! Призри на ны скорою твоею помощию и умоли Человеколюбца Бога, да не осудит нас, грешных, по беззаконием нашим, но да сотворит с нами по велицей Своей милости. Не презри моления нашего, но испроси нам у Христа Бога нашего тихое и богоугодное житие, здравие же душевное и телесное, земли плодородие и во всем изобилие, и да не во зло обратим благая, даруемая нам от Всещедраго Бога, но во славу Святаго имене Его и в прославление крепкаго твоего заступления, да подаст Он православному народу и всему Боголюбивому воинству на супостаты одоление, и да укрепит страну Его непремняемым миром и благословением. Изряднее же да

оградит нас святых ангел Своих ополчением, во еже избавитися нам, по исходе нашем из жития сего, от козней лукаваго и тяжких воздушных мытарств его, и неосужденным предстати Престолу Господа славы. Услыши нас, страстотерпче Христов Георгие, и моли за ны непрестанно Триипостаснаго Владыку всех Бога, да благодатию Его и человеколюбием, твоею же помощию и заступлением, обрящем милость со ангелы и архангелы и всеми святыми одесную Правосуднаго Судии стати, и Того выну славити со Отцем и Святым Духом, ныне и присно и во веки веков. Аминь.